

թուփիւնը, անմեղ մարդկանց ծեծը, բանտարկեալներին մերկանդամ պարել տալը, կանանց բռնաբարելը եւն., որոնք կատարուած էին հասարակ պաշտօնեաների եւ զինուորների կողմից :

Ի հարկէ, սրանց համար եւս պատասխանատու են ժողովրդիկան եւ իր կառավարութիւնը . որովհետեւ թէկուզ եւ նրանք համոզուած էլ լինէին, թէ իսկապէս «վրաց ժողովուրդը միշտ աչքի է ընկել իր հերոսութեամբ եւ քաղաքացիական պարտանաւազութեամբ», չպէտք է անգիտանալին, որ հերոսական եւ պարտաճանաչ ժողովուրդն էլ կարող է դազանային բնազդներ յայտնաբերել, եթէ համապատասխան մթնոլորտ եւ պայմաններ ստեղծուեն դրա համար : Իսկ ամէնքին յայտնի է, որ ազգայնական մթնոլորտը եւ ազգային հալածանքները — մանաւանդ երբ սրանք ուղղուած են մի նիւթապէս բարեկեցիկ ժողովուրդի դէմ — միշտ հրահանգում են հասարակ մարդկանց ընչաքաղցութիւնը, կամայականութեան տենչը եւ այլ ստորագոյն բնազդները :

Այնուամենայնիւ, մենք կանգ չենք առնում այս բնազդների շղթայագերծման եւ նրամանօրինակ պատճառների վրայ, որովհետեւ, ինչպէս ասացինք, դրանցով պայմանաւորուած են վրաց կառավարութեան կողմից պատերազմի առթիւ ձեռնարկուած հակահայկական հալածանքների արտաքին ձեւերը կամ արտայայտութիւնները, բայց ոչ թէ այն քաղաքականութիւնը, որոնք այդ հալածանքների հիմքն էին կազմում :

Այդ քաղաքականութիւնը էապէս բացատրուած է այն երեք պատճառներով, որ մենք մատնանշեցինք վերեւ՝ «պատերազմական անհրաժեշտութեան» առասպելը հերքելուց յետոյ : Ընթերցողին է մնում դատել, թէ նման պատճառներով մի ամբողջ ազգային փոքրամասնութիւն ամենակատաղի եւ ամենավարագ ճնշումների ենթարկելը որքա՞ն է համապատասխանում այն ընկերվարական եւ ժողովրդավարական սկզբունքներին, որոնց անունից շարունակ խօսում են Հանրապետական Վրաստանի վարիչները...

* * *

Դժբախտարար, հայ-վրացական պատե-

րազմի հաշուեյարդարից յետոյ եւս ժողովրդային կառավարութեան քաղաքականութիւնը, վերահայ ազգային փոքրամասնութեան խնդրում, չփոխուեց :

ձիշդ է, պատերազմական շրջանի հալածանքները դադարեցին : Այլեւս փողոցներում եւ տներում «նաղմագերիներ» չէին որսում եւ ոչ էլ զանգուածային բանտարկութիւններ կամ հրապարակային դրամաշորթութիւններ կատարում : Ընդհակառակը, Թիֆլիսում եւ այլ ուրեք «գերուած» եւ Քուլթայի աքսորուած հայերին թոյլ տուին վերադառնալ իրենց տեղերը, բանտարկեալներին արձակեցին եւ ընդհանրապէս նախապատերազմեան օրինական վիճակը վերահաստատեցին : Սակայն, այս օրինական վիճակը կրկնութիւնն էր միայն — եւ վատ ձեւի կրկնութիւնը — այն իրաւագուրկ կացութեան, որին մատնուած էր Վրաստանի հայութիւնը ազգային փոքրամասնութեան իրաւունքների տեսակէտից :

Եթէ մինչեւ պատերազմը խօսք չկար վերահայ ազգային փոքրամասնութեանը վարչական, դատաստանական կամ լեզուական առանձին իրաւունքներ տալու մասին՝ այժմ առաւել եւս : Եթէ այն ժամանակ պետական ընդհանուր բիւզջէից միայն փշրանքներ էին նետուած վերահայերի ազգային-մշակութային կարիքների համար՝ այժմ այդ փշրանքներն էլ զլացուած էին : Զլացուած էին այն աստիճան, որ վերահաստատուած Վերահայ Ազգային Խորհուրդը հարկադրուած էր Հայաստանի կառավարութեան նիւթական օգնութեանը դիմել՝ Վրաստանի հայկական դպրոցների անխուսափելի փակումը կանխելու համար...

Պատերազմի օրերին պետական պաշտօններից հեռացուած հայերը հեռացուած էլ մնացին, եւ երեք հարիւր հազարից աւելի համրանքներ կայացնող վերահայ ժողովուրդը, հազուադիւտ բացառութիւններով, մեկուսացուած էր պետական կեանքից : Նոյն մեկուսացման քաղաքականութիւնը առաջ էր տարւում եւ հանրային գործերում : Ամբողջ երկու տարի, ժողովրդային կառավարութեան աչքի առաջ, վրացիք մենատիրօրէն եւ կամայականօրէն վարում էին Թիֆլիսի քաղաքային գործերը, եւ այդ կառավարութիւնը մտքովն իսկ չէր անցնում